

ARLeF: indicade Rossella Dosso intal Cda dal Teatri Stabil Furlan

La studente e jere stade za premiade tal passât pal so lavôr sul rapuart tra culture furlane e Gurize

Une zovine gurizane intal Cda dal gnûf Teatri Stabil Furlan: si trate di **Rossella Dosso**, vincj agns, di Caprive. Studente universitarie a Udin, e je stade sielzude de ARLeF (Agenzie Regionâl pe Lenghe Furlane) par rapresentâ la Agenzie inte gnove istituzion culturâl furlane. Rossella Dosso, ancje se e je une vore zovine, e à za un curriculum culturâl nudrît, cuntune atenzion particulâr pe lenghe e pe culture furlanis. Intal 2017 e à vinçût, inte categorie students, la prime edizion dal concurs leterari "Vôs de Basse" di Sant Zorç di Noiâr, cuntune conte par furlan. Prime e veve vinçût altris premis leteraris a Commons, Scluse, Gussola (Cremone), Roncadelle (Brescia) e Rodallo (Turin).

Ai ricognossiments vûts tal passât, si è zontât dopo ancje chel de ARLeF che e à volût premiâ il lavôr di ricercje fat di Rossella in ocasion dal so diplome di maturitât, intal an scolastic 2017-2018, otignût al Liceu Classic "Alighieri" di Gurize. Si è tratât di un aprofondiment sul rûl dal storic liceu classic de capitâl dal Friûl Orientâl (chê volte *Staatsgymnasium*) inte valorizazion de lenghe furlane e inte definizion de furlanetât di Gurize tra la fin de '800 e il principi dal '900 (agns li che, par esempi, il *Staatsgymnasium* al classificave i siei students, su la base des nazionalitâts respetivis, in slovens, furlans, talians e todescs).

*«La nestre Agenzie e vûl pontâ sui zovins – al sclaris il president **Eros Cisilino** – no dome a peraulis ma cui fats. Rossella Dosso e sarà dal sigûr buine di rapresentâ intal mût miôr il leam dal Friûl cu la preziose culture mitteleuropeane; e sarà duncje dal sigûr in stât di puartâ un contribût impuartant a chel Teatri Stabil Furlan che al è a pene nassût e che si propon di produsi e di fâ zirâ tescj teatrâi di cualitât in lenghe furlane in dut il Friûl, e no dome inte aree udinese. La nomine e vûl jessi ancje un ricognossiment culturâl a di un teritori, il Friûl Orientâl, che di simpri al à dât tant ae valorizazion e al disvilup de lenghe e de culture furlane».*

Udin, ai 4 di Otubar dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / e-mail: arlef@caltpr.it

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<<<